



Број/Број: 4/1-50-1-149-7/04
Сарајево/Сарајево: 14.06.2004. године

ZAPISNIK

Sedme sjednice Zajedničke komisije Parlamentarne skupštine BiH za odbranenu i sigurnosnu politiku i nadzor nad radom odbranbenih i sigurnosnih struktura na nivou BiH.

Sjednica je održana u dva navrata i to 01.06. 2004. godine u vremenu od 11,00 do 11,30 sati i u nastavku 14.06.2004. godine, u vremenu od 12,00 do 14,00 sati.

Prvom dijelu sjednice prisustvovali su članovi Zajedničke komisije: Zoran Spasojević, Šefik Džaferović, Seada Palavrić, Boško Šiljegović, Osman Brka i Anto Spajić.

Prvom dijelu sjednice nisu prisustvovali: Halid Genjac, Vinko Zorić, Momčilo Novaković, Branko Zrno koji su bili službeno odsutni, Mirko Blagojević, te Adem Huskić sa kojim je obavljena komunikacija putem telefona.

Nastavku sjednice bili su prisutni Zoran Spasojević, Osman Brka, Branko Zrno, Halid Genjac, Anto Spajić, Boško Šiljegović, Adem Huskić, Momčilo Novaković i Seada Palavrić.

Nastavku sjednice nisu prisustvovali Vinko Zorić, Mirko Blagojević i Šefik Džaferović koji je bio službeno odsutan.

Prvom dijelu sjednice su prisustvovali predstavnici Ministarstva odbrane BiH, te predstavnici OHR-a i OSCE-a. Nastavku sjednice prisustvovali su: Marina Pendeš, zamjenik ministra odbrane BiH, Sead Delić, vojni savjetnik člana Predsjedništva BiH, Christian Haupt iz OSCE-a.

Pored navedenih, sjednici su oba puta prisustvovali, Dragica Hinić, privremeni sekretar Zajedničke komisije i Željko Grubešić, ekspert za pomoć u radu Zajedničke komisije.

Sjednicom je u oba navrata predsjedavao Zoran Spasojević.

Za raspravu na sjednici predložen je slijedeći

DNEVNI RED:

1. Usvajanje zapisnika 6. sjednice Zajedničke komisije;
2. Razmatranje poslaničkih prijedloga zaključaka iznesenih prilikom rasprave o listi kandidata za generalske pozicije u institucijama odbrane BiH radi dostave Izvještaja Zajedničke komisije Domu;
3. Konačna redakcija teksta Zakona o Državnoj agenciji za istrage i zaštitu BiH;
4. Razno.

Zoran Spasojević je na početku **prvog dijela sjednice održane 01.06.2004.** godine konstatirao da nema kvoruma za rad Zajedničke komisije, nakon čega je Šefik Džaferović predložio da se, zbog značaja Zakona čija redakcija teksta je na dnevnom redu sjednice, ovaj posao okonča na ovoj sjednici, uz prethodno izvršenu konsultaciju putem telefona s jednim članom Zajedničke komisije čime bi omogućili kvorum za valjano odlučivanje, dok bi ostale tačke dnevnoga reda bile razmatrane na nastavku sjednice. Članovi Komisije jednoglasno su prihvatili ovaj prijedlog.

Ad. 1. Konačna redakcija teksta Zakona o Državnoj agenciji za istrage i zaštitu BiH

Dragica Hinić informirala je o obavezi Komisije da po svom i zaključku Doma, uradi konačnu redakciju teksta Zakona o Državnoj agenciji za istrage i zaštitu BiH i istaknula prijedlog manjih normativno-tehničkih korekcija koje se odnose na zamjenu malih i velikih slova u nekoliko članova Zakona.

Šefik Džaferović istaknuo je da, uz naprijed predložene korekcije, tekst Zakona treba biti onakav kakav je usvojen od oba doma Parlamentarne skupštine BiH.

O ovim korekcijama, putem telefona potom je informiran i dao je saglasnost za iste Adem Huskić. Nakon njegove saglasnosti i saglasnosti ostalih članova Komisije, utvrđen je konačan tekst Zakona.

Po okončanju ove tačke dnevnoga reda, a u kontekstu same rasprave, Šefik Džaferović sugerirao je Ustavno-pravnoj komisiji, kao drugim komisijama, da se u nazivima zakona i ostalih akata koristi puni naziv države Bosna i Hercegovine a ne skraćenica.

Ad.2. Razno

a) Zoran Spasojević i Boško Šiljegović istaknuli su da su u Parlamentu već formirane tri zajedničke komisije, te da se izmjenama poslovnika oba doma koje slijede trebaju formirati još četiri zajedničke komisije. Stoga su se po njihovom mišljenju stekli uslovi za imenovanje stalnih rukovodstava zajedničkih komisija. Radi toga predložili su da Komisija usvoji zaključak kojim se od kolegija oba doma zahtijeva da odmah iniciraju i okončaju postupak izbora stalnih rukovodstava zajedničkih komisija, vodeći računa o utvrđenim kriterijima raspodjele mjesta koji se odnose na nacionalnu i starnačku pripadnost.

Članovi Komisije potom su jednoglasno usvojili predloženi zaključak.

b) Osman Brka istaknuo je potrebu da oba kolegija rasprave i odluče o prijedlozima Komisije za vanjsku i trgovinsku politiku Doma naroda za formiranje parlamentarnih tijela za saradnju sa drugim državama, kao što su npr. klubovi prijateljstva.

Šefik Džaferović je istaknuo da će ovo pitanje biti regulirano izmjenama poslovnika oba doma. Komisija za izmjene Poslovnika Predstavničkog doma u tom smislu je okončala posao, dok se čeka da Komisija Doma naroda to uradi, kako bi poslovnici bili harmonizirani u pogledu odredbi koje trebaju biti istovjetno regulirane u oba doma.

c) Christian Haupt predstavio je članovima Komisije Željka Grubešića, eksperta za pomoć u radu Komisiji, koji će raditi na osnovu zaključenog memoranduma između OSCE-a i Parlamenta BiH. Potom se i Željko Grubešić predstavio i ukratko i dao osnovne biografske podatke.

Boško Šiljegović i Osman Brka predložili su da se članovima Komisije do naredne sjednice dostavi biografija imenovanog u pisanoj formi, te spisak svih članova Komisije, sekretara i eksperta sa brojevima telefona radi omogućavanja međusobnih kontakata.

Ovaj prijedlog jednoglasno je prihvaćen.

Nastavak 7. sjednice održan 14.06.2004. godine

Na nastavku 7. sjednice predložen je i razmatran slijedeći dnevni red:

1. Usvajanje zapisnika 6. sjednice Zajedničke komisije;
2. Razmatranje poslaničkih prijedloga zaključaka iznesenih prilikom rasprave o listi kandidata za generalske pozicije u institucijama odbrane BiH radi dostave Izvještaja Zajedničke komisije Domu;

3. Razmatranje Prijedloga odluke o utvrđivanju liste kandidata za generalske pozicije u institucijama odbrane BiH (predlagač: Predsjedništvo BiH);
4. Razno.

Ad.1. Usvajanje zapisnika 6. sjednice Zajedničke komisije

Zapisnik 6. sjednice Komisije usvojen je jednoglasno.

Ad.2. Razmatranje poslaničkih prijedloga zaključaka iznesenih prilikom rasprave o listi kandidata za generalske pozicije u institucijama odbrane BiH radi dostave Izvještaja Zajedničke komisije Domu

Zoran Spasojević informirao je o predlozima zaključaka poslanika Zlatka Lagumdžije, Seade Palavrić i Milorada Živkovića, koje su podnijeli prilikom rasprave pred Predstavničkim domom o prvom Prijedlogu odluke o utvrđivanju liste kandidata za generalske pozicije u institucijama odbrane BiH. Na toj sjednici Doma usvojen je zaključak kojim se Zajedničkoj komisiji i Komisiji za ljudska prava, imigraciju, izbjeglice i azil nalaže da do naredne sjednice Doma podnesu izvještaj o predmetnim prijedlozima zaključaka. Komisija za ljudska prava u međuvremenu je imala sjednicu, nakon čega je sačinjen i njen izvještaj o prijedlozima zaključaka, koji Zajednička komisija ima na uvid na ovoj sjednici.

Nakon kraćeg informiranja predsjedavajućeg Komisije otvorena je rasprava u kojoj su učestvovali Osman Brka, Adem Huskić, Momčilo Novaković, Boško Šiljegović, Seada Palavrić, Halid Genjac i Sead Delić.

Članovi Komisije bili su jednoglasni u stavu da izvještaji o prijedlozima zaključaka Zajedničke komisije i Komisije za ljudska prava, imigraciju, izbjeglice i azil trebaju biti u najvećoj mjeri podudarni, kako ne bi bilo razmimoilaženja prilikom rasprave na Domu. Kako je Komisija za ljudska prava sačinila svoj izvještaj koji sadrži u najvećem dijelu gotovo sve predložene zaključke, članovi Zajedničke komisije jednoglasno su odlučili da se razmatra taj izvještaj odn. prijedlozi zaključaka slijedom predlaganja.

Predloženi zaključak broj 1. usvojen je jednoglasno u istovjetnom tekstu.

Predloženi zaključak broj 2. usvojen je jednoglasno u istovjetnom tekstu.

Predloženi zaključak broj 3. izazvao je prethodnu raspravu u kojoj su učestvovali Seada Palavrić, Momčilo Novaković, Adem Huskić, Branko Zrno i Halid Genjac.

Seada Palavrić i Adem Huskić mišljenja su da je neophodno da tekst zaključka ostane isti kao u Izvještaju Komisije za ljudska prava jer je neophodno istaći obavezu poštovanja osnovnih principa ljudskih prava koja su u ovom slučaju bila ugrožena.

Momčilo Novaković predložio je da se tekst ovog zaključka iza riječi «transparentan» briše, jer je faktički sadržan u zaključku broj 2. Osim toga mišljenja je da su i u drugim slučajevima bila ugrožena ljudska prava i slobode koji nisu bili predmet zaključaka.

Halid Genjac je nakon toga dao kompromisni prijedlog zaključka koji bi uključivao prvi dio rečenice dok bi se tekst iza riječi «transparentan» zamjenio tekстом «a dijelovi tog procesa vođeni su na način da se nije vodilo računa o principima poštivanja ljudskih prava i osnovnih sloboda».

Kako g-din Novaković nije odustao od svog prijedloga po ovom zaključku članovi Zajedničke komisije glasali su o njegovom prijedlogu zaključka i prijedlogu zaključka g-dina Genjca.

Prijedlog zaključka g-dina Novakovića odbijen je s 4 glasa protiv, 1 glasom za i 3 uzdržana glasa, dok je prijedlog zaključka g-dina Genjca usvojen s 7 glasova za i 2 uzdržana glasa.

Predloženi zaključak broj 4. usvojen je s 8 glasova za i 1 uzdržanim glasom.

Predloženi zaključak broj 5. usvojen je jednoglasno.

Pored ovako usvojenih zaključaka, Halid Genjac je predložio da se usvoji još jedan zaključak zbog značaja problematike koja je razmatrana a glasi:

«Pored upućivanja ovog izvještaja Predstavničkom domu na što je obavezana njegovim zaključkom, Zajednička komisija upućuje Izvještaj i Domu naroda Parlamentarne skupštine BiH na razmatranje vodeći računa o značaju zaključaka.»

Za izvjestioce o Izvještaju određeni su Seada Palavrić i Zoran Spasojević.

Ad.3. Razmatranje Odluke o utvrđivanju liste kandidata za generalske pozicije u institucijama odbrane BiH

Zoran Spasojević informirao je Komisiju da je u međuvremenu Predsjedništvo BiH dostavilo Odluku o utvrđivanju liste kandidata za generalske pozicije u institucijama odbrane BiH, kojim se popunjavaju preostala mjesta u Zajedničkom štabu i Operativnoj komandi BiH.

Potom je otvorena rasprava u kojoj su učestvovali Momčilo Novaković, Sead Delić, Halid Genjac, Seada Palavrić, Adem Huskić, Osman Brka, Boško Šiljegović.

Momčilo Novaković istaknuo je da je informiran putem novinskog članka da kandidat Sifet Podžić koristi tuđi stan, te naveo da će izraziti rezervu prilikom glasanja za ovog kandidata ako se ovi natpisi pokažu tačnim. I Pravila i propisi Izborne komisije bili su takvi da se nije mogao kandidirati niko ko je koristio tuđu imovinu. Stoga i Podžić, kao osoba koja će biti na čelu oružanih snaga, mora biti bez ikakvih mrlja u bilo kom pogledu.

Rasim Delić naveo je da su svi kandidati prošli sve moguće provjere i na kraju provjeru SFOR-a, da su novinski članci neosnovani jer postoji Odluka Doma za ljudska prava kojim se odbija zahtjev ranijeg korisnika, te da Podžić koristi stan potpuno legalno u skladu s postojećim zakonima. On je otvoreno iskazao da će predmetni stan napustiti odmah bez ikakvog uslovljavanja, ukoliko se izmjeni postojeći zakon.

Seada Palavrić, Halid Genjac i Osman Brka mišljenja su da se rasprava mora voditi na osnovu argumenata i dokaza, a ne na osnovu novinskih natpisa. Korištenje tuđe imovine regulirano je zakonom, po kome g-din Podžić legalno koristi stan. Po saznanju g-đe Palavrić prethodni korisnik stana nije uopće podnio zahtjev za povrat stana što je bio dužan učiniti po zakonu. U kontekstu navedenog postoji i Odluka Doma za ljudska prava kojom je odbijen zahtjev ranijeg korisnika za povrat stana.

Boško Šiljegović je istaknuo da je i prilikom rasprave o prethodnoj odluci Predsjedništva BiH, na Domu naroda data uslovna saglasnost za kandidata Sakiba Forića, za kojeg su tražene određene provjere i informacije koje još uvijek nisu dostavljene. Treba zauzeti isti stav prema svim ovakvim slučajevima.

Nakon okončane rasprave postavljeno je pitanje načina glasanja o predloženim kandidatima, nakon čega je ipak odlučeno da se glasa o kompletnoj listi kandidata, a ne pojedinačno.

Potom je Odluka o utvrđivanju liste kandidata usvojena jednoglasno, s tim da su tri člana Komisije i to Momčilo Novaković, Boško Šiljegović i Zoran Spasojević izdvojili mišljenje i izrazili rezervu o prvom kandidatu Sifetu Podžiću u vezi njegove stambene situacije.

Seada Palavrić je također istaknula da se u zapisniku navede činjenica da g-din Podžić koristi stan u potpunosti u skladu s postojećim zakonskim propisima, te da Izborni zakon i Zakon o državnoj službi postavljaju kao osnovni uslov za povrat stana podneseni zahtjev za povrat, a što korisnik u ovom slučaju nije učinio.

Po usvajanju Odluke, članovi Komisije saglasili su se da se od Ministarstva odbrane BiH zatraže sve informacije vezane za provjeru stambene situacije g-dina Podžića.

Ad.4. Razno

a) Članovi Zajedničke komisije informirani su o pozivu za učešće tri člana ove komisije u radionici na temu "Izrada Individualnog programa partnerstva" u Oberamergau, u periodu od 05. do 09. jula 2004. godine, u organizaciji NATO-a i Ministarstva odbrane BiH. Potom su jednoglasno utvrdili prijedlog kolegijima domova za upućivanje Šefika Džaferovića, Boška Šiljegovića i Branka Zrne.

b) Christian Haupt informirao je o pozivu Ministarstva odbrane RS-e članovima ove kao i etiteskim komisijama za odbranu, radi posjete ovom ministarstvu, Generalštabu Vojske RS-e i jednoj vazduhoplovnoj jedinici 22.06.2004. godine. Na ovaj način dolazi se do novih saznanja i postiže se bolja saradnja svih institucija u oblasti odbrane i sigurnosti. Članovi Komisije prihvatili su navedeni poziv i u zavisnosti od obaveza odazvat će se istom.

c) Željko Grubešić obrazložio je informaciju o obavljenom službenom putu u Brisel u organizaciji OSCE-a, gdje su prisustvovali i ostali eksperti iz entitetskih parlamenata. Ovu informaciju članovi Komisije primili su k znanju.

d) Željko Grubešić i Christian Haupt istaknuli su da postoji dosta važnih događaja i aktivnosti koje bi ova komisija u vršenju parlamentarnog nadzora trebala razmatrati, te predložili da sekretar Komisije uz njihovu saradnju, kandidira predsjedavajućem Komisije ova pitanja za dnevni red narednih sjednica, što je jednoglasno prihvaćeno. Također, Seada Palavrić predložila je da se na jednoj od narednih sjednica razmatra rad Interpola BiH, te pozove direktor Interpola na samu sjednicu, što je također prihvaćeno.

e) Momčilo Novaković istaknuo je da je na jednoj od prethodnih sjednica Komisije zaključeno da se od Ministarstva odbrane BiH zatraže akta vezana za status g-dina Enesa Bećirbašića, odnosno pitanja kada je prestao njegov profesionalni angažman u Vojski FBiH. Na ovo traženje stigao je dopis koji je potpisao sam Bećirbašić, što je kod njega izazvalo još veću sumnju. Uz taj dopis dostavljena su određena akta, osim akta o prestanku aktivne vojne službe u Vojski FBiH. Kako bi ovaj problem bio raščišćen do kraja, predložio je da Komisija zatraži od Ministarstva odbrane i ovaj akt o prestanku aktivne vojne službe g-dinu Bećirbašiću. Članovi Komisije nisu imali ništa protiv navedenog prijedloga.

Zapisnik sačinila:
Dragica Hinić

Privremeni predsjedavajući
Zajedničke komisije:
Zoran Spasojević